



**Amodau
Cydnabod
Safonol
Ychwanegol ar
gyfer Tystysgrif
Her Sgiliau
Bagloriaeth
Cymru**



IONAWR 2022

Cynnwys

| | |
|--|----|
| Hanes y fersiwn | 3 |
| Cymhwyso'r Ddogfen Reoleiddio hon | 3 |
| Cyflwyniad | 4 |
| Adran 1 - Amodau Safonol Ychwanegol ar gyfer Tystysgrif Her Sgiliau Bagloriaeth Cymru A-L – Marcio Canolfannau, Cymedroli, Adolygiadau Cymedroli ac Apeliadau | 5 |
| Amod Bagloriaeth Cymru A – Trefniadau marcio..... | 5 |
| Amod Bagloriaeth Cymru B – Trefniadau Cymedroli | 5 |
| Amod Bagloriaeth Cymru C – Hysbysu am ganlyniad gwaith Cymedroli..... | 7 |
| Amod Bagloriaeth Cymru D – Adolygu gwaith Cymedroli..... | 8 |
| Amod Bagloriaeth Cymru E – Proses apelio ar gyfer Tystysgrif Her Sgiliau Bagloriaeth Cymru | 11 |
| Amod Bagloriaeth Cymru F – Penderfyniadau gan Ganolfannau Perthnasol ynghylch Trefniadau Adolygu ac Apeliadau..... | 13 |
| Amod Bagloriaeth Cymru G – Perfformiad targed mewn perthynas â Threfniadau Adolygu ac Apeliadau | 14 |
| Amod Bagloriaeth Cymru H – Trefniadau Adolygu ac Apeliadau a thystysgrifau..... | 15 |
| Amod Bagloriaeth Cymru I – Darganfod methiant mewn prosesau asesu..... | 15 |
| Amod Bagloriaeth Cymru J – Cyhoeddi Trefniadau Adolygu ac Apeliadau | 16 |
| Amod Bagloriaeth Cymru K – Dehongli a Diffiniadau..... | 16 |
| Adran 2 - Amod Bagloriaeth Cymru M - Pennu ffiniau graddau Tystysgrif Her Sgiliau Bagloriaeth Cymru | 19 |
| ATODIAD 1 - Adolygiadau o waith Cymedroli ac apeliadau: gofynion ar gyfer dyddiadau allweddol | 20 |

Hanes y fersiwn

Dyma fersiwn 4 o'r Ddogfen Rheoleiddio Cymwysterau Cymru hon ac fe'i cyhoeddwyd ar 17 Ionawr 2022.

Diweddarwyd y ddogfen hon ym mis Ionawr 2022 oherwydd bod cymwysterau Tystysgrif Her Sgiliau (Bagloriaeth Cymru) Sylfaen (Ôl-16) a Chenedlaethol (Ôl-16) CBAC a'u fframweithiau Bagloriaeth Cymru cysylltiedig wedi dod i ben yn 2020.

Mae'r ddogfen hon hefyd ar gael yn [Saesneg](#).

Rydym yn adolygu ein Dogfennau Rheoleiddio ac yn croesawu adborth ar unrhyw adeg. Anfonwch unrhyw sylwadau at polisi@cymwysteraucymru.org.

Cymhwyso'r Ddogfen Reoleiddio hon

Dim ond mewn perthynas â'r cymwysterau Tystysgrif Her Sgiliau a ganlyn a'u fframweithiau Bagloriaeth Cymreig cysylltiedig (y '**cymwysterau perthnasol**') y mae'r ddogfen hon yn berthnasol:

- Tystysgrif Her Sgiliau Cenedlaethol / Sylfaen (Bagloriaeth Cymru) CBAC – QWAN C00/0721/7 (a fframwaith Bagloriaeth Cymru Cenedlaethol / Sylfaen CBAC – QWAN C00/0721/3)
- Tystysgrif Her Sgiliau Uwch (Bagloriaeth Cymru) CBAC – QWAN C00/0721/2 (a fframwaith Bagloriaeth Cymru Uwch – QWAN C00/0721/6).

Cyflwyniad

Mae'r ddogfen hon yn nodi'r Amodau Cydnabod Safonol Ychwanegol sy'n berthnasol mewn perthynas â'r cymwysterau perthnasol fel y nodir uchod.

Adran 1 - Amodau Safonol Ychwanegol A-L - Adolygiadau, Cymedroli ac Apeliadau

Mae'r adran hon yn nodi Amodau Cydnabod Safonol Ychwanegol ar gyfer adolygu'r broses o gymedroli'r cymwysterau perthnasol ac apeliadau ynghylch y cymwysterau hynny.

Adran 2 - Amod Safonol Ychwanegol M - Ffiniau Gradd

Mae'r adran hon yn nodi Amod Cydnabod Safonol Ychwanegol sy'n ymwneud â'r gweithdrefnau y mae'n rhaid i gyrrff dyfarnu eu defnyddio i bennu ffiniau graddau ar gyfer y cymwysterau perthnasol.

Adran 1 - Amodau Safonol Ychwanegol ar gyfer Tystysgrif Her Sgiliau Bagloriaeth Cymru A-L – Marcio Canolfannau, Cymedroli, Adolygiadau Cymedroli ac Apeliadau

Mae'r adran hon yn nodi Amodau Cydnabod Safonol Ychwanegol sy'n berthnasol i'r cymwysterau perthnasol fel y nodir uchod o dan y pennawd 'Cymhwyso'r Ddogfen Reoleiddio hon'.

Amod Bagloriaeth Cymru A – Trefniadau marcio

- WB.A1 Mewn perthynas â phob cymhwyster perthnasol a gynigir ganddo lle y caiff asesiad ei farcio gan Ganolfan, rhaid i gorff dyfarnu sicrhau bod y trefniadau yn darparu bod y corff dyfarnu yn cynnig hyfforddiant i'r Ganolfan, cyn i'r Ganolfan farcio'r asesiad.
- WB.A2 Mewn perthynas â phob cymhwyster perthnasol a gynigir ganddo, rhaid i gorff dyfarnu sicrhau bod y gwaith monitro a wneir yn unol ag Amod Safonol C1.1(b) yn cynnwys monitro p'un a yw Aseswyr yn marcio mewn ffordd sy'n cydymffurfio ag Amodau Cydnabod y corff dyfarnu.

Amod Bagloriaeth Cymru B – Trefniadau Cymedroli

- WB.B1 Pan fydd Canolfan yn marcio tystiolaeth a gynhyrchir gan Ddysgwyr mewn asesiad ar gyfer cymhwyster sydd ar gael gan gorff dyfarnu, rhaid i'r corff dyfarnu fod â threfniadau clir ac effeithiol ar waith i ymgymryd â gwaith Cymedroli'r asesiad.
- WB.B2 Rhaid i gorff dyfarnu sicrhau bod unrhyw waith Cymedroli o'r fath y mae'n ei gynnal yn caniatáu iddo benderfynu:
- (a) a yw'r asesiad yn parhau i fod yn addas at y diben, ac
 - (b) a yw'r meini prawf ar gyfer gwahaniaethu perfformiad dysgwyr yn cael eu cymhwyso'n gywir ac yn gyson gan Aseswyr mewn gwahanol Ganolfannau, waeth beth yw hunaniaeth yr Asesydd, y Dysgwr, neu'r Ganolfan.
- WB.B3 Rhaid i gorff dyfarnu:
- (a) sicrhau bod unrhyw waith Cymedroli o'r fath y mae'n ei wneud yn sicrhau ei fod yn gallu gwneud unrhyw newidiadau

angenrheidiol i waith marcio Canolfan o dystiolaeth a gynhyrchir gan Ddysgwyr mewn asesiad, a

(b) gwneud newid o'r fath lle bynnag y mae'n ei ystyried yn angenrheidiol er mwyn sicrhau bod yr asesiad yn parhau i fod yn addas at y diben neu fod y meini prawf y mae perfformiad Dysgwyr yn cael eu gwahaniaethu yn eu herbyn yn cael eu cymhwyso'n gywir ac yn gyson.

WB.B4

Mewn perthynas â phob cymhwyster perthnasol sy'n cynnwys trefniadau Cymedroli a gynigir ganddo, rhaid i gorff dyfarnu sicrhau bod y trefniadau sydd ar waith yn unol ag Amod Safonol H2.1 yn darparu ar gyfer y canlynol –

(a) y caiff yr holl waith Cymedroli yn cael ei wneud gan bersonau sydd â chymhwysedd priodol ac nad oes ganddynt fuddiant personol yng nghanlyniad y Cymedroli,

(b) na ddylai person a gymerodd ran yn y broses o farcio asesiad gan Ganolfan yn flaenorol fod yn rhan o'r broses Gymedroli mewn perthynas â'r gwaith marcio hwnnw,

(c) cyn ymgymryd ag unrhyw waith Cymedroli, y rhoddir hyfforddiant i bob person sy'n gyfrifol am ymgymryd â gwaith Cymedroli o'r fath,

(d) cyn ymgymryd ag unrhyw waith Cymedroli, y rhoddir copi o'r canlynol i'r personau sy'n gyfrifol am ymgymryd â gwaith Cymedroli o'r fath –

(i) unrhyw dystiolaeth a gynhyrchwyd gan y Dysgwyr y mae angen ei hystyried at ddiben Cymedroli neu, lle na ddelir dystiolaeth o'r fath neu na ellir gwneud copi ohoni yn hawdd, cynrychioliad o'r dystiolaeth ar ffurf arall,

(ii) y cofnod o'r marciau a ddyfarnwyd gan yr Aseswyr adeg marcio'r dystiolaeth honno,

(iii) unrhyw sylwadau a gofnododd yr Aseswyr wrth farcio'r dystiolaeth honno, a'r

(iv) meini prawf a ddefnyddir i wahaniaethu perfformiad y Dysgwyr yn eu herbyn,

(e) y bydd y corff dyfarnu yn monitro a yw'r personau sy'n ymgymryd â'r gwaith Cymedroli –

- (i) yn gwneud hynny mewn ffordd sy'n cydymffurfio ag Amod Safonol H2, ac
- (ii) yn gwneud penderfyniadau sy'n gyson dros amser ac yn gyson â phenderfyniadau a wnaed gan ei gilydd,

(f) lle a bo'r corff dyfarnu yn dod i wybod, drwy ei waith monitro neu fel arall, nad ymgymeryd â'r broses Gymedroli mewn ffordd sy'n cydymffurfio ag Amod Safonol H2, neu wedi'i gyflawni'n anghyson, y bydd yn cymryd pob cam rhesymol i wneud y canlynol -

- (i) cywiro effaith y methiant, neu lle na ellir ei chywiro, ei lliniaru cymaint â phosibl, a
- (ii) sicrhau na fydd y methiant yn digwydd eto yn y dyfodol.

WB.B5 Mewn perthynas â phob cymhwyster perthnasol sy'n cynnwys trefniadau Cymedroli a gynigir ganddo, rhaid i gorff dyfarnu sicrhau bod y gwaith monitro a wneir yn unol ag Amod Safonol C1.1(b) yn cynnwys monitro p'un a yw personau sy'n ymgymryd â gwaith Cymedroli yn gwneud hynny mewn ffordd sy'n cydymffurfio ag Amodau Cydnabod y corff dyfarnu.

WB.B6 Mewn perthynas â phob cymhwyster perthnasol a gynigir ganddo, neu y mae'n bwriadu ei gynnig, lle y caiff asesiad ei farcio gan Ganolfan, rhaid i gorff dyfarnu hysbysu Canolfannau (yn ddigon pell ymlaen llaw i fodloni eu gofynion cynllunio rhesymol) am ei ofynion mewn perthynas ag erbyn pryd y mae'n rhaid darparu marciau ar gyfer yr asesiad a deunyddiau mewn perthynas â'r asesiad iddo er mwyn ei alluogi i ymgymryd â'r gwaith Cymedroli.

Amod Bagloriaeth Cymru C – Hysbysu am ganlyniad gwaith Cymedroli

WB.C1 Mewn perthynas â phob cymhwyster perthnasol a gynigir ganddo lle y caiff asesiad ei farcio gan Ganolfan, rhaid i gorff dyfarnu hysbysu'r Ganolfan o ganlyniad y gwaith Cymedroli er mwyn rhoi digon o amser i'r Ganolfan ystyried p'un a ddylid gwneud cais i

adolygu'r gwaith Cymedroli, gan ystyried unrhyw derfyn amser ar gyfer cyflwyno cais o'r fath i'r corff dyfarnu.

WB.C2 Rhaid i'r hysbysiad a ddarperir gan gorff dyfarnu at ddibenion WB.C1 nodi'r rhesymau am ganlyniad y gwaith Cymedroli.

Amod Bagloriaeth Cymru D – Adolygu gwaith Cymedroli

WB.D1 Mewn perthynas â phob cymhwyster perthnasol sy'n cynnwys trefniadau Cymedroli a gynigir ganddo, rhaid i gorff dyfarnu sefydlu, cynnal a chydymffurfio â threfniadau i gynnal, ar gais gan Ganolfan, adolygiad o unrhyw Gymedroli gan y corff dyfarnu o farcio asesiad y Ganolfan honno.

WB.D2 Gall y trefniadau -

(a) ddarparu mai dim ond ar ôl talu ffi y bydd y corff dyfarnu yn cynnal adolygiad o'r gwaith Cymedroli,

(b) nodi gofynion rhesymol eraill ar gyfer gwneud cais i adolygu gwaith Cymedroli, a

(c) nodi terfyn amser ar gyfer gwneud cais am adolygiad o waith Cymedroli.

WB.D3 Lle bo'r trefniadau yn nodi terfyn amser ar gyfer gwneud cais am adolygiad o waith Cymedroli, rhaid i'r dyddiad -

(a) fod yn rhesymol, gan ystyried y canlynol –

(i) y terfyn amser ar gyfer hysbysu Canolfan am ganlyniad gwaith Cymedroli yn unol â threfniadau'r corff dyfarnu, a

(ii) diben Tystysgrif Her Sgiliau Bagloriaeth Cymru,

(b) gydymffurfio â'r gofynion a nodir yn Atodiad 1 yr Amodau hyn.

WB.D4 Rhaid i'r trefniadau ddarparu ar gyfer y canlynol, ar ôl cynnal adolygiad o'r gwaith Cymedroli -

(a) lle bo'r corff dyfarnu wedi penderfynu nad oedd y gwaith

Cymedroli yn cynnwys Gwall Cymedroli, na fydd yn gwneud unrhyw newidiadau i ganlyniad y gwaith Cymedroli,

(b) lle bo'r corff dyfarnu wedi penderfynu bod y gwaith Cymedroli yn cynnwys Gwall Cymedroli, y bydd yn gwneud newidiadau i ganlyniad y gwaith Cymedroli i'r graddau sy'n angenrheidiol er mwyn cywiro effaith y Gwall Cymedroli, ond na fydd yn gwneud unrhyw newidiadau eraill i ganlyniad y gwaith Cymedroli, a

(c) y bydd y corff dyfarnu yn dogfennu'r rhesymau am unrhyw benderfyniad ac am unrhyw newid i ganlyniad y gwaith Cymedroli.

WB.D5

Rhaid i'r trefniadau ddarparu ar gyfer y canlynol -

(a) y caiff yr holl adolygiadau o waith Cymedroli eu cynnal gan bersonau sy'n meddu ar gymhwysedd priodol ac nad oes ganddynt fuddiant personol yng nghanlyniad yr adolygiad sy'n cael ei gynnal,

(b) na ddylai unigolyn a gymerodd ran yn y broses o farcio asesiad gan Ganolfan neu mewn gwaith Cymedroli mewn perthynas â'r gwaith marcio hwnnw yn flaenorol fod yn rhan o'r broses Gymedroli mewn perthynas â'r gwaith marcio hwnnw,

(c) cyn cynnal unrhyw adolygiad o waith Cymedroli, y rhoddir hyfforddiant i bob person sy'n gyfrifol am gynnal adolygiad o'r fath o ran sut i wneud hynny yn unol â'r Amod hwn,

(d) cyn cynnal adolygiad o waith Cymedroli, y rhoddir copi o'r canlynol i'r person sy'n gyfrifol am gynnal adolygiad o'r fath –

- i. copi o unrhyw dystiolaeth a gynhyrchwyd gan Ddysgwyr (neu unrhyw gynrychioliad o dystiolaeth o'r fath) a ystyriwyd at ddiben y gwaith Cymedroli,
- ii. copi o'r cofnod o'r marciau a ddyfarnwyd gan yr Aseswyr adeg marcio'r dystiolaeth honno,
- iii. copi o unrhyw sylwadau a gofnododd yr Aseswyr wrth farcio'r dystiolaeth honno,

- iv. copi o'r meini prawf a ddefnyddir i wahaniaethu perfformiad y Dysgwyr yn eu herbyn, a
- v. canlyniad y gwaith Cymedroli, gan gynnwys unrhyw newidiadau a wnaed i farc y Ganolfan, a'r rhesymau am y canlyniad hwnnw,

(e) y bydd y corff dyfarnu yn monitro p'un a gynhelir adolygiadau o'r gwaith Cymedroli yn unol â'r Amod hwn,

(f) lle bo'r corff dyfarnu yn dod i wybod, drwy ei waith monitro neu fel arall, na chynhaliwyd adolygiad o'r gwaith Cymedroli yn unol â'r Amod hwn, y bydd yn cymryd pob cam rhesymol i wneud y canlynol –

- i. cywiro effaith y methiant, neu lle na ellir ei chywiro, ei lliniaru cymaint â phosibl, a
- ii. sicrhau na fydd y methiant yn digwydd eto yn y dyfodol,

(g) y bydd y corff dyfarnu yn hysbysu'r Ganolfan am ganlyniad yr adolygiad o'r gwaith Cymedroli a, naill ai ar y cyd â'r canlyniad hwnnw neu'n ddiweddarach, y rhesymau a ddogfennwyd pan gynhaliwyd yr adolygiad o'r gwaith Cymedroli, a

(h) wrth gynnal adolygiad o waith Cymedroli, pan fydd y corff dyfarnu yn darganfod gwall wrth gymedroli asesiad, y bydd yn cynnwys manylion y gwall yn ei adroddiad i'r Ganolfan ar ganlyniad yr adolygiad o'r gwaith Cymedroli.

WB.D6

Ar ôl hysbysiad y corff dyfarnu o ganlyniad yr adolygiad o'r gwaith Cymedroli, rhaid i'r trefniadau ddarparu ar gyfer y canlynol -

(a) y caiff marciau a (lle y bo'n briodol) ganlyniadau eu diweddarau'n ddi-oed er mwyn ystyried unrhyw newid yng nghanlyniad y gwaith Cymedroli,

(b) y caiff marciau a (lle y bo'n briodol) ganlyniadau eu diweddarau'n ddi-oed er mwyn cywiro effaith unrhyw Wall Cymedroli y rhoddwyd gwybod i'r Ganolfan amdano yn unol â'r Amod hwn, a

(c) y cymerir camau rhesymol i nodi unrhyw asesiad arall, y bu gwall tebyg mewn perthynas ag ef ac i ddiweddarau'r marciau a (lle y bo'n briodol) ganlyniadau yn ddi-oed er mwyn cywiro effaith unrhyw wall a nodir,

ar yr Amod na chaiff canlyniad Dysgwr ei ddiweddarau fel bod y canlyniad hwnnw yn is.

Amod Bagloriaeth Cymru E – Proses apelio ar gyfer Tystysgrif Her Sgiliau Bagloriaeth Cymru

- WB.E1 Mewn perthynas â phob cymhwyster perthnasol a gynigir gan gorff dyfarnu, neu y mae'n bwriadu ei gynnig, nid yw Amod Safonol I1 (Y broses apeliadau) yn gymwys.
- WB.E2 Mewn perthynas â phob cymhwyster perthnasol a gynigir ganddo, rhaid i gorff dyfarnu sefydlu, cynnal a chydymffurfio â phroses apeliadau y mae'n rhaid iddi ddarparu ar gyfer apêl yn erbyn y canlynol -
- (a) canlyniad adolygiad o waith Cymedroli
 - (b) penderfyniadau ynghylch Addasiadau Rhesymol ac Ystyriaeth Arbennig, a
 - (c) penderfyniadau sy'n ymwneud ag unrhyw gamau gweithredu a gymerwyd yn erbyn Dysgwr neu Ganolfan yn dilyn ymchwiliad i achos o gamymddwyn neu gamweinyddu.
- WB.E3 Gall y broses apeliadau –
- (a) darparu mai dim ond ar ôl talu ffi y bydd y corff dyfarnu yn cynnal apêl,
 - (b) nodi gofynion eraill ar gyfer gwneud cais am apêl, ar yr Amod bod gofynion o'r fath yn rhesymol, a
 - (c) nodi cyfnod amser ar gyfer gwneud cais am apêl.
- WB.E4 Lle bo'r trefniadau yn nodi cyfnod amser ar gyfer gwneud cais am apêl, rhaid i'r cyfnod amser –
- (a) fod yn rhesymol, a

(b) chydymffurfio â'r gofynion a nodir yn Atodiad 1 yr Amodau hyn..

WB.E5

Rhaid i'r broses apeliadau ddarparu ar gyfer y canlynol –

(a) y caiff pob penderfyniad ar apêl ei wneud gan unigolion sy'n meddu ar gymhwysedd priodol

(b) bod y corff dyfarnu yn cymryd pob cam rhesymol i sicrhau nad oes unrhyw wrthdaro buddiannau a all gael Effaith Anffafriol,

(c) y caiff pob penderfyniad ar apêl ei wneud gan bersonau nad oeddent yn rhan o unrhyw waith marcio yn flaenorol, gwaith Cymedroli, nac adolygiad o Waith Cymedroli blaenorol sy'n ymwneud ag asesiad mewn perthynas â Dysgwr y mae'r apêl yn ymwneud ag ef,

(d) y bydd y penderfyniad terfynol mewn perthynas â chanlyniad apêl yn cynnwys o leiaf un gwneuthurwr penderfyniad nad yw wedi'i gyflogi gan y corff dyfarnu, yn Aseswr sy'n gweithio ar ran y corff dyfarnu, neu'n ymwneud fel arall â'r corff dyfarnu, a

(e) y bydd y corff dyfarnu yn rhoi gwybod i'r Dysgwr (neu'r Ganolfan Berthnasol os yw'n briodol) am ganlyniad apêl, gan nodi'r rhesymau am y canlyniad hwnnw.

WB.E6

Ni ddylai'r broses apeliadau ganiatáu unrhyw newid i lefel cyrhaeddiad benodedig a bennwyd ar gyfer y cymhwyster perthnasol.

WB.E7

At ddibenion WB.E2(a), rhaid i'r broses apeliadau sydd ar waith gan gorff dyfarnu ddarparu ar gyfer apeliadau effeithiol yn erbyn canlyniadau gwaith Cymedroli ar y sail –

(a) bod y gwaith Cymedroli (neu'r adolygiad o'r gwaith Cymedroli os yw'n briodol) yn cynnwys Gwall Cymedroli, a

(b) na chymhwysodd y corff dyfarnu'r gweithdrefnau'n gyson neu na ddilynwyd y gweithdrefnau mewn ffordd briodol a theg, ar yr Amod na fydd unrhyw enghraifft o arddel barn academiaidd mewn perthynas â chanlyniad y gwaith Cymedroli, at y dibenion hyn, yn gyfystyr â chymhwyso neu ddilyn gweithdrefn.

WB.E8 At ddibenion WB.E2(a), rhaid i'r broses apeliadau sydd ar waith gan gorff dyfarnu ddarparu –

(a) i unrhyw gais am apêl yn erbyn canlyniad gwaith Cymedroli gael ei wneud gan y Ganolfan, a

(b) yn dilyn canlyniad apêl, na chaiff canlyniad Dysgwr ei ddiweddarau fel bod y canlyniad hwnnw yn is.

WB.E9 At ddibenion WB.E2(a), gall y broses apeliadau sydd ar waith gan gorff dyfarnu nodi lle y cyflawnwyd asesiad gan Ganolfan Berthnasol, bod yn rhaid i'r Ganolfan Berthnasol gyflwyno unrhyw gais am apêl mewn perthynas â Dysgwr sy'n ymwneud â'r asesiad (ar ran y Dysgwr).

Amod Bagloriaeth Cymru F – Penderfyniadau gan Ganolfannau Perthnasol ynghylch Trefniadau Adolygu ac Apeliadau

WB.F1 Mewn perthynas â phob cymhwyster perthnasol a gynigir ganddo, lle mae trefniadau corff dyfarnu yn darparu bod rhaid i gais o dan WB.D a WB.E2 (a) gael ei wneud gan Ganolfan Berthnasol ar ran Dysgwr, rhaid i'r corff dyfarnu cymryd pob cam rhesymol i sicrhau bod gan y Ganolfan Berthnasol drefniadau effeithiol ar waith i'r Dysgwr -

(a) wneud cais i'r Ganolfan Berthnasol iddo wneud cais o'r fath, a

(b) apelio yn erbyn penderfyniad Canolfan Berthnasol na ddylid gwneud cais o'r fath, ac i'r Ganolfan Berthnasol benderfynu ar yr apêl honno.

WB.F2 At ddibenion yr Amod hwn, rhaid i gorff dyfarnu gymryd pob cam rhesymol er mwyn sicrhau'r canlynol –

(a) bod y Ganolfan Berthnasol yn sicrhau bod Dysgwyr yn ymwybodol o'r trefniadau sydd ar waith ganddo cyn cyhoeddi canlyniadau mewn perthynas â'r asesiad, a

(b) bod y Ganolfan Berthnasol yn rhoi datganiad o'r trefniadau i Ddysgwyr yn ddi-oed pan ofynnir amdano.

Amod Bagloriaeth Cymru G – Perfformiad targed mewn perthynas â Threfniadau Adolygu ac Apeliadau

- WB.G1 Mewn perthynas â phob cymhwyster perthnasol a gynigir ganddo, neu y mae'n bwriadu ei gynnig, rhaid i gorff dyfarnu bennu targedau ar gyfer pob un o'r cyfnodau amser canlynol -
- (a) y cyfnod yn dilyn cais am adolygiad o waith Cymedroli a wnaed gan y corff dyfarnu lle bydd y corff dyfarnu wedi rhoi gwybod i'r Ganolfan am ganlyniad yr adolygiad o'r gwaith Cymedroli,
- (b) y cyfnod yn dilyn cais am adolygiad o'r fath o waith Cymedroli lle bydd y corff dyfarnu wedi rhoi gwybod i'r Ganolfan am ganlyniad yr adolygiad o'r gwaith Cymedroli a'r rhesymau dros gynnal yr adolygiad,
- (c) y cyfnod yn dilyn cais am apêl lle bydd y corff dyfarnu wedi rhoi gwybod i'r Dysgwr (neu'r Ganolfan os yw'n briodol) am ganlyniad yr apêl, a
- (d) y cyfnod ar ôl derbyn yr holl dystiolaeth mewn perthynas ag apêl lle bydd y corff dyfarnu wedi rhoi gwybod i'r Dysgwr (neu'r Ganolfan os yw'n briodol) am ganlyniad yr apêl.
- WB.G2 Rhaid i unrhyw gyfnod amser targed a bennir gan gorff dyfarnu mewn perthynas â chymhwyster perthnasol gydymffurfio ag unrhyw ofynion y gall Cymwysterau Cymru eu cyhoeddi a'u diwygio o bryd i'w gilydd.
- WB.G3 Rhaid i gorff dyfarnu gymryd pob cam rhesymol i fodloni'r cyfnodau amser targed a bennwyd ganddo mewn perthynas â chymhwyster perthnasol.

Adrodd

- WB.G4 Mewn perthynas â phob cymhwyster perthnasol a gynigir ganddo, rhaid i gorff dyfarnu ddarparu adroddiad i Gymwysterau Cymru mewn perthynas â phob blwyddyn yn nodi faint o weithiau y mae wedi -
- (a) cydymffurfio â'r cyfnodau targed y mae wedi'u bennu, a

(b) methu â chydymffurfio â'r cyfnodau amser targed hynny.

WB.G5 Rhaid i gorff dyfarnu sicrhau bod yr adroddiad a baratowyd yn unol ag Amod WB.G4 -

(a) yn cydymffurfio ag unrhyw ofynion mewn perthynas â chynnwys neu gyflwyniad yr adroddiad y gall Cymwysterau Cymru ei gyhoeddi a'i ddiwygio o bryd i'w gilydd,

(b) yn cael ei ddarparu i Gymwysterau Cymru erbyn unrhyw ddyddiad sydd wedi'i bennu gan Gymwysterau Cymru ymlaen llaw, a

(c) yn cael ei gyhoeddi, lle y mae Cymwysterau Cymru yn gofyn amdano, erbyn unrhyw ddyddiad a bennwyd gan Gymwysterau Cymru ymlaen llaw.

Amod Bagloriaeth Cymru H – Trefniadau Adolygu ac Apeliadau a thystysgrifau

WB.H1 Mewn perthynas â phob cymhwyster perthnasol a gynigir ganddo, lle mae canlyniad Dysgwr wedi'i newid o dan Drefniadau Adolygu ac Apelio'r corff dyfarnu, rhaid i'r corff dyfarnu gymryd pob cam rhesymol, gan gynnwys cael gweithdrefnau ar waith, i -

(a) dirymu unrhyw dystysgrif y mae wedi'i rhoi i'r Dysgwr hwnnw, a

(b) rhoi tystysgrif amnewid sy'n adlewyrchu'n gywir y marc diwygiedig.

Amod Bagloriaeth Cymru I – Darganfod methiant mewn prosesau asesu

WB.I1 Os bydd corff dyfarnu yn darganfod methiant yn ei broses asesu ar ôl iddo gymhwyso ei Drefniadau Adolygu ac Apeliadau neu broses apeliadau yn achos Canolfan, rhaid iddo gymryd pob cam rhesymol i wneud y canlynol -

(a) nodi unrhyw Ganolfan arall y mae'r methiant wedi effeithio arno,

(b) cywiro effaith y methiant, neu lle na ellir ei chywiro, ei lliniaru cymaint â phosibl, a

(c) sicrhau na fydd y methiant yn digwydd eto yn y dyfodol.

Amod Bagloriaeth Cymru J – Cyhoeddi Trefniadau Adolygu ac Apeliadau

- WB.J1 Mewn perthynas â phob cymhwyster perthnasol a gynigir ganddo, neu y mae'n bwriadu ei gynnig, rhaid i gorff dyfarnu gyhoeddi datganiad o'i Drefniadau Adolygu ac Apeliadau (mewn un neu fwy o ddogfennau), gan gynnwys manylion -
- (a) sut y mae'n rhaid gwneud unrhyw gais am phob math o adolygiad ac apêl,
- (b) unrhyw ddyddiad erbyn pryd y mae'n rhaid gwneud pob math o gais,
- (c) unrhyw ffi sy'n daladwy mewn perthynas â phob math o gais, yr amgylchiadau pan godir unrhyw ffi o'r fath, a'r amgylchiadau pan ellir ad-dalu unrhyw ffi o'r fath, a
- (ch) y cyfnod amser targed a bennwyd mewn perthynas â phob math o gais o dan Amod WB.G.

- WB.J2 Rhaid i'r wybodaeth y mae corff dyfarnu yn ei chyhoeddi yn unol â WB.J1 alluogi Dysgwyr a Chanolfannau gael -
- (a) dealltwriaeth resymol o'r trefniadau hynny, a
- (b) dealltwriaeth resymol o sut mae'r trefniadau hynny'n ymwneud â'i gilydd.

- WB.J3 Rhaid i gorff dyfarnu gymryd pob cam rhesymol i sicrhau bod y wybodaeth y mae'n ei chyhoeddi ar ei Drefniadau Adolygu ac Apeliadau ar gyfer cymhwyster perthnasol yn cael ei chyhoeddi'n ddigon pell cyn yr amser y gwneir y cymhwyster y maent yn ymwneud ag ef, ar gael i Ddysgwyr i fodloni gofynion cynllunio rhesymol darpar brynwyr.

Amod Bagloriaeth Cymru K – Dehongli a Diffiniadau

- WB.K1 Bydd y rheolau o ran dehongli a diffiniadau a amlinellir yn Amod Safonol J1 yn gymwys i'r Amodau Cydnabod Safonol Ychwanegol

ar gyfer cymwysterau Tystysgrif Her Sgiliau Bagloriaeth Cymru perthnasol.

WB.K2 Ac eithrio o dan yr amgylchiadau a ddisgrifir yn WB.K3, mae'r gofynion a osodir gan yr Amodau Cydnabod Safonol Ychwanegol ar gyfer cymwysterau Tystysgrif Her Sgiliau Bagloriaeth Cymru perthnasol yn gymwys yn ogystal â'r gofynion a osodir gan yr Amodau Cydnabod Safonol.

WB.K3 I'r graddau y ceir unrhyw anghysondeb rhwng un o ofynion Amod Cydnabod Safonol Ychwanegol ar gyfer cymwysterau Tystysgrif Her Sgiliau Bagloriaeth Cymru perthnasol ac un o ofynion Amod Cydnabod Safonol, fel na allai corff dyfarnu gydymffurfio â'r ddau ofyniad hynny, rhaid i'r corff dyfarnu gydymffurfio â gofyniad yr Amod Cydnabod Safonol Ychwanegol ar gyfer cymwysterau Tystysgrif Her Sgiliau Bagloriaeth Cymru perthnasol ac nid yw'n ofynnol iddo gydymffurfio â gofyniad yr Amod Cydnabod Safonol.

WB.K4 Yn yr Amodau hyn, bydd gan y geiriau canlynol yr ystyr a roddwyd iddynt isod (a dylid dehongli ymadroddion cytras yn unol â hynny) –

Gwall Cymedroli

Achos o bennu canlyniad gwaith Cymedroli na ellid bod wedi'i bennu'n rhesymol o ystyried y dystiolaeth a luniwyd gan Ddysgwyr a ystyriwyd at ddiben y gwaith Cymedroli, gwaith marcio'r Ganolfan mewn perthynas â'r dystiolaeth honno, y meini prawf a ddefnyddir i wahaniaethu perfformiad Dysgwyr yn eu herbyn ac unrhyw weithdrefn sydd ar waith gan y corff dyfarnu mewn perthynas â Chymedroli, gan gynnwys yn arbennig pan fo canlyniad y gwaith Cymedroli yn seiliedig ar -

(a) Gwall Gweinyddol,

(b) methiant i gymhwyso meini prawf a gweithdrefnau o'r fath at y dystiolaeth a luniwyd gan Ddysgwyr lle nad oedd y methiant hwnnw yn cynnwys arddel barn academaidd, neu

(c) achos o arddel barn academaidd mewn modd afresymol.

Canolfan Berthnasol

Mewn perthynas â Dysgwr, Canolfan sydd -

- (a) wedi prynu'r cymhwyster perthnasol (ar ran y Dysgwr), a
- (b) wedi cyfrannu'n sylweddol at baratoi'r Dysgwr ar gyfer yr asesiad (boed hynny drwy addysgu neu gyfarwyddyd a ddarperir gan Athrawon a gyflogir ganddo neu fel arall), a
- (c) wedi cyflwyno'r asesiad i'r Dysgwr.

Trefniadau Adolygu ac Apeliadau

Mewn perthynas â'r cymwysterau perthnasol, y trefniadau y mae'n ofynnol i gorff dyfarnu eu sefydlu, eu cynnal a'u cydymffurfio yn unol â:

- (a) WB.D (Adolygu gwaith Cymedroli)
- (b) WB.E (Proses apelio ar gyfer Tystysgrif Her Sgiliau Bagloriaeth Cymru)

Adran 2 - Amod Bagloriaeth Cymru M - Pennu ffiniau graddau Tystysgrif Her Sgiliau Bagloriaeth Cymru

Mae'r adran hon yn nodi Amod Cydnabod Safonol Ychwanegol sy'n berthnasol mewn perthynas â'r cymwysterau perthnasol a bennir uchod o dan y pennawd 'Cymhwyso'r Ddogfen Reoleiddio hon'.

WB.M1 Mewn perthynas â phob cymhwyster perthnasol a gynigir ganddo, rhaid i gorff dyfarnu gydymffurfio ag unrhyw ofynion, ac ystyried unrhyw ganllawiau, y gall Cymwysterau Cymru eu cyhoeddi a'u diwygio o bryd i'w gilydd mewn perthynas â phennu lefelau cyrhaeddiad penodedig.

WB.M2 Wrth bennu'r lefelau cyrhaeddiad penodedig ar gyfer cymhwyster perthnasol a gynigir ganddo, rhaid i gorff dyfarnu ystyried amrywiaeth briodol o dystiolaeth ansoddol a meintiol.

Dim ond os bydd yn cynnwys tystiolaeth o unrhyw un, neu fwy, o'r canlynol y bydd yr amrywiaeth o dystiolaeth a ystyrir gan gorff dyfarnu at ddibenion yr Amod hwn yn briodol-

(a) y lefel cyrhaeddiad a ddangoswyd yn yr asesiadau hynny gan sampl gynrychioliadol briodol o'r Dysgwyr sy'n astudio'r cymhwyster hwnnw.

(b) y lefel cyrhaeddiad a ddangoswyd gan y Dysgwyr sy'n astudio'r cymhwyster hwnnw mewn -

- i) asesiad blaenorol (nad oedd ar gyfer y cymhwyster hwnnw), p'un a oedd yr asesiad hwnnw ar gyfer cymhwyster a reoleiddir ai peidio, neu
- ii) cymhwyster blaenorol, p'un a oedd y cymhwyster hwnnw yn gymhwyster a reoleiddir ai peidio, neu

(c) y lefel cyrhaeddiad a ddangoswyd gan Ddysgwyr y dyfarnwyd y cymhwyster iddynt yn flaenorol.

WB.M3 Rhaid i gorff dyfarnu gadw cofnod o'r canlynol-

a) y dystiolaeth a ystyriwyd ganddo wrth bennu'r lefelau cyrhaeddiad penodedig ar gyfer cymhwyster a gynigir ganddo, a

b) ei resymeg dros ddewis y dystiolaeth honno a sut y mae wedi ystyried y dystiolaeth honno.

ATODIAD 1

Adolygiadau o waith Cymedroli ac apeliadau: gofynion ar gyfer dyddiadau allweddol

Tystysgrif Her Sgiliau Bagloriaeth Cymru

Rydym yn nodi isod y gofynion y mae'n rhaid i gorff dyfarnu gydymffurfio â hwy wrth ddynodi terfynau amser ar gyfer gwneud cais am adolygiadau o waith Cymedroli ac apeliadau. Cyhoeddir y gofynion hyn yn unol ag Amodau Bagloriaeth Cymru WB.D3(b) a WB.E4(b).

Mae'n ofynnol i gyrff dyfarnu fodloni dyddiad cau penodol o ran caniatáu ceisiadau am adolygiadau o waith Cymedroli ac apeliadau. Lle bydd cyrff dyfarnu yn pennu dyddiadau cau ar gyfer caniatáu adolygiadau o waith cymedroli ac apeliadau, rhaid i'r dyddiadau cau hyn gydymffurfio â'r gofynion a nodir isod a'r holl ofynion eraill yn ei Amodau Cydnabod.

Yn arbennig, rhaid darllen y gofynion a nodir isod a chydymffurfio â hwy ar y cyd â'r Amodau Cydnabod Safonol Ychwanegol ar gyfer cymwysterau Tystysgrif Her Sgiliau Bagloriaeth Cymru perthnasol (sy'n nodi gofynion pellach mewn perthynas â threfniadau corff dyfarnu).

Gofynion o ran dyddiadau allweddol ar gyfer asesiadau Tystysgrif Her Sgiliau Bagloriaeth Cymru

Rhaid i gorff dyfarnu sicrhau y bodlonir y gofynion yn y tabl isod ym mhob achos. Mae'r tabl yn nodi'r cyfnod amser gofynnol y mae'n rhaid i'r corff dyfarnu dderbyn cais am adolygiad/apêl oddi fewn iddo. Ar yr Amod y caniateir cais am adolygiad/apêl o fewn y cyfnod amser hwnnw, caniateir hefyd i gorff dyfarnu ddarparu 'gwasanaeth cyflymach'.

| | Cam | Gofynion o ran cyfnod amser |
|----------|---|---|
| A | Y dyddiad y bydd corff dyfarnu yn cyhoeddi canlyniad ei waith cymedroli. | |
| B | Dyddiad cau cyflwyno cais i gynnal adolygiad o waith cymedroli ¹ . | Rhaid caniatáu o leiaf bedair wythnos yn dilyn Cam A i'r ganolfan sy'n cyflwyno'r cais wneud cais o'r fath. |

¹ Rhaid i unrhyw ddyddiad a bennir gydymffurfio ag Amod WB.D3, gan gynnwys cydymffurfio â'r gofynion a nodir yn y tabl.

| | | |
|----------|--|--|
| C | Y dyddiad y bydd corff dyfarnu yn rhoi gwybod am ganlyniad yr adolygiad o waith Cymedroli ² . | |
| D | Y dyddiad y bydd corff dyfarnu yn rhoi rhesymau dros ganlyniad yr adolygiad ³ . | |
| E | Dyddiad cau cyflwyno cais am apêl o ganlyniad adolygiad o waith Cymedroli ⁴ . | Rhaid caniatáu o leiaf bedair wythnos yn dilyn Cam C i'r ganolfan sy'n cyflwyno'r cais wneud cais o'r fath, a Rhaid caniatáu o leiaf bythefnos yn dilyn Cam D i'r ganolfan sy'n cyflwyno'r cais wneud cais o'r fath. |
| F | Mae'r corff dyfarnu yn rhoi gwybod am ganlyniad yr apêl ⁵ . | |

² O dan Amod WB.G, mae'n ofynnol i gyrff dyfarnu sicrhau bod yr holl gamau rhesymol ar waith i gyrraedd targed ar gyfer yr amser y bydd yn ei gymryd i gwblhau adolygiad, a chymryd y camau hynny

³ O dan Amod WB.G, mae'n ofynnol i gyrff dyfarnu sicrhau bod yr holl gamau rhesymol ar waith i gyrraedd targed ar gyfer yr amser y bydd yn ei gymryd i gwblhau adolygiad, a chymryd y camau hynny

⁴ Rhaid i unrhyw ddyddiad a bennir gydymffurfio ag Amod WB.G, gan gynnwys cydymffurfio â'r gofynion a nodir yn y tabl

⁵ O dan Amod WB.G, mae'n ofynnol i gyrff dyfarnu sicrhau bod yr holl gamau rhesymol ar waith i gyrraedd targed ar gyfer yr amser y bydd yn ei gymryd i gwblhau apêl, a chymryd y camau hynny.